

Meeqqanik pinerliisimannginnermut uppernarsaatinik piumasaqaateqartussaataaneq pillugu Inatsisartut inatsisaata allanngortinnera pillugu Inatsisartut inatsisaat (Atuuffiata annertusinera)

§ 1

Meeqqanik pinerliisimannginnermut uppernarsaatinik piumasaqaateqartussaataaneq pillugu Inatsisartut inatsisaanni nr. 8, 19. maj 2010-meersumi makku allanngortinneqarput:

1. § 1 ima oqaasertaqassaaq:

”§ 1. Inatsisartut inatsisaat manna atuuppoq pisortat ingerlatsinikkut oqartussaaffisa tamarmik, aamma inuit inatsisitigullu inuttaasut, inunnik suliamik suliarineranni meeqqanut 15-it inorlugit ukiulinnut toqqaannartumik attaveqartartussanik atorfnitsitsineranni sulilersitsineranniluunniit, aamma inunnut sulinerminnut atatillugu meeqqat 15-it inorlugit ukiullit aalajangersimasumik akornanniittartunut, taamaalillutillu meeqqanut taakkununga toqqaannartumik attaveqarsinnaasunut, tak. § 3.”

2. § 2, imm. 1, naggat siullesq ima oqaasertaqassaaq:

”Inatsisartut inatsisaat manna naapertorlugu meeqqanik pinerliisimannginnermut uppernarsaatit paasineqassapput tassaasut Pinerluuteqarsimasunik Qitiusumik Nalunaarsuiffimmiit paasissutissat, inuit suliamik suliarinerannut ilaatillugu meeqqanut 15-it inorlugit ukiulinnut toqqaannartumik attaveqartartussat atorfnitsinnissaannut sulilersinnissaannulluunniit atatillugu imaluunniit sulinerminnut atatillugu meeqqat 15-it inorlugit ukiullit aalajangersimasumik akornanniittartunut, taamaalillutillu taakkununga toqqaannartumik attaveqarsinnaasunut atatillugu, piumasarineqarnerata kingorna Naalagaaffiup Politiivinit ingerlateqqinneqarsinnaasut.”

3. § 3, imm. 1, oqaaseqatigiinni siullerni ”ilinniartitsisutut” kingorna ilanngunneqassapput:

”atuakkanik atorniartitsisartutut, katersugaasivinni sulisutut”.

4. § 3, imm. 1, nr. 1-imi ”meeqqat atuarfinut” kingorna ilanngunneqassaaq: ”kommunimi atuakkanik atorniartarfinnut”.

5. § 3, imm. 1, nr. 2, ima oqaasertalerneqassaaq:

”2) Naalakkersuisut, napparsimavinnut oqartussaasutut, uku ilanngullugit: Dronning Ingridip Napparsimavia, Namminersorlutik Oqartussat ulloq-unnuarlu paaqqinnittarfutaat, innarluutilinnik paaqqinnittarfiit ilanngullugit, katersugaasiviit aamma Nunatta Atuagaateqarfia.”

6. § 3, imm. 3-p kingorna, immikkoortutut nutaatut ilanngunneqassaaq:

"Imm. 4. Kommunalbestyrelsip meeqqanik 15-it inorlugit ukiulinnik nalinginnaasumik angajoqqaarsianut, tassanngaannartumik angajoqqaarsiaasartunut, inuussutissarsiutigalugu angajoqqaarsiaasartunut aamma ilaqutariinnik oqilisaasunut inissiinernut atatillugu qularnaassavaa, angajoqqaarsiat imaluunniit ilaqutariinnik oqilisaasut illoqataasa 15-it sinnerlugit ukiullit tamarmik meeqqanik pinerliisimanngininnermik uppersaateqarnissaat, taamatullu kommunip aaqqissugaanik namminersortutulluunniit angerlarsimaffimmi paarsisartunut, paarsineq paarsisuusup angerlarsimaffiani pigaangat, aammattaaq nuuttoqarnerani."

Tamatuma kingorna imm. 4-6 tassaalissapput imm. 5-7.

§ 2

Inatsisartut inatsisaat atuutilerpoq 1. august 2015, atuuffigalugillu 1. august 2015-imiit atorfinitsitsinerit sulilersitsinerillu.

Imm. 2. § 1, nr. 6 atuuppoq angajoqqaarsiaqartitsinernut Inatsisartut inatsisaata atuutilernerata kingorna pilersinneqartunut. Angajoqqaarsiaqartitsinernut Inatsisartut inatsisaata atuutilernera sioqqullugu pilersinneqarsimasunut, § 1, nr. 6 atuutissaaq, inunnut Inatsisartut inatsisaata atuutilernerata kingorna illoqatigiinnut ilaalersunut.

Namminersorlutik Oqartussat, 3. juni 2015

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut